

समा. 09.20 Hrs



- पूरे जम्मू-कश्मीर च “गुरपूरव” धार्मिक जोश ते जज्बें कन्नै मनाया जा रदा ऐ। लैफ्टिनेंट गवर्नर मनोज सिन्हा ते मुख्मन्त्री उमर अब्दुल्ला होरें “गुरु नानक देव जी” हुंदी जयंति पर शुभकामनां भेंट कीतिया ना।
- भारती सेना नै इक टकोहदी खुफिया सूह पर कार्यवाही करदे होई जम्मू-कश्मीर दे छात्रू इलाके च इक आतंकवाद विरोधी मुहीम चलाई ऐ।
- सरकार अज्ज नमीं दिल्ली च चौथे राष्ट्रव्यापी डिजीटल लाईफ सर्टिफिकेट प्रचार दी शुरुआत करोगा।
- बिहार विधान सभा चुनाएं दे पैहले मरहले तैहत 121एं चुनां हलकें लेई कल मतदान करोआया जागा।
- जम्मू-कश्मीर च उच्चियें धारें पर बर्फबारी होई ते बरखा पेई।



अज्ज पूरे देशै च “गुरुनानक जयंति” यानि “गुरुपूर्व” दा त्योहार धार्मिक श्रद्धा कन्नै मनाया जा रदा ऐ। सिक्ख धर्म दे संस्थापक गुरु नानक देव जी हुंदी 556मी दी जयंति पर सिक्ख समुदाय दे लोक अज्ज गुरुद्वारें जाइयै प्रार्थना करदे न, नगर-कीर्तन करदे न ते लंगर दी बवस्था करदे न। अज्ज मुल्लै दे मते सारे इलाकें, खासकरियै उनें इलाकें जित्थे सिक्ख समुदाय रौहन्दे न- उनें इलाकें च छुट्टी ऐ। जम्मू च अज्ज मुख कार्यक्रम बीबी-चांद-कोर गुरुद्वारें च होआ रदा ऐ जित्थे नगरकीर्तन ते लंगर दी बवस्था बी ऐ।



उपराज्यपाल मनोज सिन्हा होरें अज्ज “गुरु नानक जयंति प्रकाश पर्व” दियां सब्भनें लोकें गी मुबारखबाद दिती ऐ। अपने सनेह च उपराज्यपाल होरें गलाया जे गुरु नानक देव जी उन्दी सिक्खेया असेंगी प्यार, भाईचारे समानता ते सच्चाई दी बत्त दस्सदी ऐ। उनें लोकें गी गुरु नानक देव जी हुंदी सिक्खेया गी अपने जीवन च अपनाने लेई गलाया तां जे अस अपने समाज च शांति ते भाईचारे गी कायम रक्खी सकचे। मुख्मन्त्री उमर अब्दुल्ला होरें बी अज्ज “गुरु नानक जयंति” दी सब्भनें लोकें गी बधाई दिती ऐ। अपने स्नेह च उनें गलाया जे गुरु नानक देव जी उन्दी सिक्खेया असेंगी समानता, करुणता ते निस्वार्थ सेवा दी प्रेरणा दिंदी ऐ- जेहदे राएं अस मानवता दा भला करी सकगै। मुख्मन्त्री होरें प्रार्थना कीती जे गुरु नानक देव जी म्हेशा जम्मू-कश्मीर च सुखशांति बनाई रक्खन।

<><><><><><>

LG Jhiri

उपराज्यपालमल मनोज सिन्हा होरें गलाया ऐ जे तेज आर्थिक विकास लेई सांस्कृतिक-विरासत दी साम्भ-संभाल अत्त लाजमी ऐ। उनें गलाया जे पारम्परिक रिति-रिवाजे, कलाएं ते शिल्यें गी सांस्कृतिक अध्यात्मिक आयोजनें राएं अगले पीढ़ी तगर पजाना लोड़चदा ऐ। उप-राज्यपाल होरें जम्मू जिले दे मढ उप-डिविजन च आयोजित “झिड़ी” मेले दे उदघाटनी समारोह दौरान एह गल्ल आखी। उनें गलाया जे जवाबदेई गी बढ़ावा देने, सेवा वितरण च सुधार लोआने ते मते समावेशी ते पारदर्शी शासन गी बढ़ावा देने लेई शासन च सामुदायक भागीदारी गी यकीनी बनाना लोड़चदा ऐ। उनें अधिकारियें ते लोकें दे प्रतिनिधियें गी आपसी तालमेल बनाइयै कम्म करने लेई गलाया तांजे मुकामी कलाकारें शिल्पकारें ते बपारियें लेई बजारें दी पुज्जत सक्खली होई सकै।

<><><><><><>

Army Op

भारती सेना दी वाईट नाईट कोर दे सतर्क जोआनें जम्मू-कश्मीर दे किश्तवाड़ जिले दे छात्रू इलाके च आतंकी नैटवर्क उप्पर तड़के हमला करी दिता। एह अभियान जेहदा कोड नां आपरेशन छात्रू ऐ, अज्ज मूंह न्हरे घनें जंगलें च चलाया गया। वाईट नाईट कोर दे इक अधिकारिक ब्यान मुजब एहू सांझी घेराबंदी ते तलाशी अभियान आतंकियें दी मौजूदगी दे बारे च मिली दी खूफिया जानकारी मगरा शुरु कीता गया। एहदे बारे होर मती जानकारी गी अजे बलगेया जा रदा ऐ।

<><><><><><>

Digital Life Certificate Campaign

अमले सार्वजिक शकैतें ते पेंशनरें सरबंधी मामलें दे मंत्री डाक्टर जितेन्द्र सिंह होर अज्ज नमीं दिल्ली च चौथे राष्ट्रव्यापी डिजीटल लाईफ सर्टिफिकेट अभियान दी शुरुआत करोआंगन। मंत्री होरें आखेया जे महिना भर चलने आला ए अभियान मुख्य भरै च ढाई हजार कैम्पें च आयोजित कीता जाग। उनें अगगे आखेया जे इस अभियान दा मकसद टैक्रालोजी दी मदद कन्नै पेंशनरें दे डिजीटल सशक्तिकरण च बाद्दा करना ऐ। ए अभियान ए यकीनी बनाने लेई आयोजित कीता जा करदा ऐ, जे बुजुर्ग पेंशनर अपने जीवन सरबंधी दस्तावेज आराम कन्नै जमा करोआई सकन। इलैक्ट्रानिक्स ते सूचना टैक्रालोजी मंत्रालय ते भारत दी टकोहदी पंछान सरबंधी प्राधिकरण (UID) इस अभियान दौरान तकनीकी सहायता उपलब्ध करोआग।

<><><><><><>

India US Relations

वाईट हाउस नै अमरीकी राष्ट्रपति डोनाल्ड ट्रम्प हुंदे भारत कन्नै सरबन्ध तगड़े करने दे धेइयै गी पक्का कीता ऐ। वैशक्क रुस थमां तेल आयात करने ते कारोबारी शुल्क बधाने पर दौनें मुलखें बश्कार तनोतनी चला रदी ऐ। अमरीकी प्रैस सचिव कैरोलीन लेविट होरें आखेया जे राष्ट्रपति भारत कन्नै भ्याली दी कदर करदे न ते उनें प्रधानमंत्री नरेन्द्र मोदी हुंदे कन्नै वाईट हाउस च दिवाली समारोह दौरान गल्ल बी कीती ही। इस देयाली समारोह च भारती –अमरीकी अधिकारी शामिल होए हे। उनें दस्सेया भारत च अमरीका दे राजदूत सराजियो

गोर ते ट्रम्प हुंदी बपार टीमै बश्कार नमीं दिलू च सरगर्मीं कन्नै गल्लबता चला रदी ऐ। उनें आखेया जे राष्ट्रपति ट्रम्प मोदी हुंदी बड़ी इज्जत करदे न ते उन्दे नै गल्लबात करदे रौहन्दे न।

<><><><><><>

Bihar Polling First Phase

बिहार च 18एं जिलें दे इक सौ 21एं विधान सभा चुना हल्के दे पैहले गेड़ दे चुनां कल करोआए जागंन। मतदान आहली प्रक्रिया आज्ञादाना निरपक्ख ते शांति आहले ढंगै सिर करोआने लेई सुरक्षा दे व्यापक प्रबंध कीते गेदे न। मतदान बडुलै 7 बजे शुरु होग ते संजा 6 बजे सम्पन्न होग। चुनां दे इस गेड़ च कुल इक जहार 314 मेदवार मैदान च न, जिंदे भागें दा फैसला 3 करोड़ 75 लक्ख मतदाता करगंन। इंदे चा 122 महिला मेदवार ते इक ट्रांसजेंडर मेदवार प्रीति किन्नर ऐ, जेड़ी जन सूरज पार्टी दी टिकटै परां गोपालगंज जिले दे भोरे विधान सभा हल्के थमां चुनां मैदान च ऐ।

<><><><><><>

CS NHLML

जम्मू-कश्मीर दे मुख् सचिव अटल डुल्लू होरें कल राष्ट्रीय जरनैली सिडक रसद प्रबंधन लिमिटेड NHLML आसेया जम्मू-कश्मीर च बड्डियें ढांचागत परियोजनाएं दी अमलावरी दी रफ्तार दा जायजा लैता। मीटिंग च मुख् करियै पर्वतमाला स्कीम तैहत रोपवे परियोजना, कटरा दे अंतर मॉडल स्टेशन ते जम्मू च MMLP पर ध्यान केन्द्रित कीता गया- जिंदा प्रांतै च राबता बेहतर करने, रसद दी ढोआई ते सैलसफा बधाने च अहम योगदान ऐ। रोपवे परियोजनाएं दा जायजा लैंदे होई मुख् सचिव होरें दसेया जे संघ शासित प्रशासन लगातार आओ-जाई दे साधन बधाइयै मुख् सैलानी थाहरें तकर राबता बधाने लेई पैहल दी बिनाह पर कम्म करा रदा ऐ। मुख् सचिव होरें सब्भनैं बकाया पेदे माली ते प्रशासनिक मसलें गी तौले शा तौले नबेड़ियै बेल्ले सिर परियोजनाएं गी रम्भ करने दा आहवान कीता।

<><><><><><>

Ramban Farmers (Byte)

करसानें गी राई-बाई सरबंधी बक्ख-बक्ख विश्विद्यालयें च भेजियै उनेंगी राई –बाई दे आधुनिक तौर-तरीकें ते उपकरणें बारे जानकार कीता जा रदा ऐ। हाल च गै रामबन जिले दे राई-बाई विभाग नै करसानें दे इक समूह गी पंजाब राई-बाई विश्वविद्यालय लुधियाना भेजेया तां जे करसानें गी कृषि चुनौतियें- नमियें तकनीकें- राई-बाई सरबंधी लगातार चलने आहले असरदार तौर-तरीके बारे जानकार कीता जाई सकै।

<><><><><><>

Button Mushrooms

कृषि उत्पादन ते करसान कल्याण जम्मू आसेया कल DCTC कृषि भवन तलाब तिल्लो च बटन खुम्बे गी चुनने दा उदघाटन कीता गया। इस मौके बोलदे होई मिशन डायरेक्टर HADP संदीप कुमार होरें खुम्ब दे उत्पादन

गी बढावा देने लेई राई-बाई मैहकमे दी सराहना कीती। उनें आखेया इस चाली करसान पूरे साल खुम्बे दी पैदावार करी सकगन ते उंदी आमदनी दी इक पक्की बवस्था होई सकोग।

KVS Jammu

केन्द्रीय विश्वविद्याल संगठन जम्मू प्रांत नै KVS National Sports Meet च 17एं बरे थमां हेठली बरेसू आले वर्ग च क्रिकेट टूर्नामेंट च कैह दा तगमा जितियै इतिहास बनाया ऐ। एह मैच अहमदाबाद-गुजरात ते गांधी नगर स्टेडियम च होआ। जम्मू प्रांता नै जयपुर गी 8एं विकेटें कन्नै हराया ते कै दा तगमा जिती लेया।

<><><><><><>

Weather

जम्मू-कश्मीर दे पहाड़ी इलाकें जिंदे च गुलमर्ग ते सोनमर्ग बी शामिल न- च जंदी रातीं बर्फबारी होई ते किश इलाकें च बरखा पेई। कश्मीर-किश्तवाड़-पुंछ च बर्फबारी होई जदके श्रीनगर-जम्मू ते होर दुए इलाकें च जंदी संजा बरखा पौने करी खिते च तापमान चिगला औने करी ठंड बधी गेई। मौसम विभाग दे डायरैक्टर डाक्टर मुख्तार अहमद होरें दस्सेया ऐ जे अज्ज तापमान बदलौखड़ा रौहग- ऊआं कश्मीर ते जम्मू खिते दे पहाड़ी इलाकें च हल्की बर्फबारी जां बरखा पौने दी मेद ऐ। उनें गलाया जे 6 नवम्बर शा 15 नवम्बर तगर मौसम खुशक गै रौहग।

<><><><><><>